

四庫全書

集部

欽定四庫全書

集部

存家詩稿卷三

一至

詳校官監察御史_臣徐如澍

侍讀_臣孫球覆勘

總校官編修_臣王燕緒

校對官編修_臣朱依魯

謄錄監生_臣陳維宗

欽定四庫全書

集部六

存家詩稿

別集類五

明

提要

臣等謹案存家詩稿八卷明楊巍撰巍字伯謙號夢山海豐人嘉靖丁未進士累官吏部尚書贈少保巍敷歷中外居官有能聲自跋稱幼習舉子業不知詩至嘉靖乙卯外補晉臬提學曹忤始導之為詩歸田後與山人呂

時臣相倡和得詩六百餘篇屬邢侗鄒觀光
評隲而存之蓋其中歲學詩與唐高適事頗
相類而天分超卓自然拔俗故能不染埃壒
獨發清聲王士禎池北偶談稱其五言簡古
得陶體為明人所少又舉其前年視我山中
病落日獨騎驄馬來記得任家亭子上連翹
花發共銜杯一絕蓋其神韻清雋與士禎論
詩宗旨相近故尤賞之然其他高曠簡古之

作尚復不少固與當時嘈雜之音相去遠矣
士禎嘗選訂其詩為三卷屬謝重輝刻之今
未見此即鄒觀光刪定之本也乾隆四十六
年十月恭校上

總纂官

臣紀昀

臣陸錫熊

臣孫士毅

總校官

臣陸

費

墀

欽定四庫全書

提要

欽定四庫全書

存家詩稿卷一

明 楊魏 撰

五言古

述征二首

嘉靖丁巳
外補晉果

嗟余丘壑姿趨世良非宜始作毘陵宰既登赤玉墀兩
官無寸補竊祿負明時還家田已廢覽鏡鬢多絲復畏
簡書去遠於關塞期骨肉重分手離憂當告誰

朝發滄海湄暮走西河道秋風吹河水野闊聲浩浩客
心亦如此旅飯豈能飽頻瞻太行雲復弔燕臺草世事
多艱辛顏鬢忽已老悠悠行路人誰知此懷抱

彈琴峽

瑤琴何處聞停車空緬想谷靜水聲幽霜餘山氣朗無
聲心亦閒况復聞清響大道晦有時靈物豈易賞徘徊
坐磐石高歌動林莽

送王同年中丞

通霸州人
自延綏歸

兄也景畧流平生更慷慨世事一到手此身即不愛開
府向沙磧咫尺是賊壘籌策走風電河山有別態西人
膽正寒印綬倏然解吾輩去留間豈無天意在今年予
衰甚亦欲浮於海他日修短札從兄乞沆瀣

送漳渠楊公分守雲中

悵望雲中城猶隔桑乾水遠道令人愁况近單于壘單
于何猖狂侵掠日未已蒼茫應與朔滿眼生荆杞天子
厓宵旰吾徒寧不恥楊公慷慨人憤時恒拊髀談兵樽

徂間往往得神理茲行詎徒然王庭應遠徙分手勿躊躇丈夫志萬里

讀友問集

何遷著

獨把一編坐門前雙鳥喧春風來幾日草木倏以蕃因茲悟至理兀兀欲忘言

旅中偶讀元次山西陽城之詩追憶舊遊擬作四首

海

仲尼欲浮海而我居海邊海中有大魚岸上有薄田種
田須荷鋤捕魚還刺船農夫與漁父相見復相憐

楞嚴寺

此寺置何年大唐貞觀歲中藏白石碣上刻前賢字地
居古河邊門臨野無際憶我讀書時寒榻同僧睡

馬谷山

馬谷近愚谷所以人跡稀昔名烏鵲山不見烏鵲飛惟
有紫巖菜其苗高且肥洞口封白雲專待主人歸

三里村

去城三里遙亦無客來往本是老農家荷鋤非勉強既
喜兒童愚又見桑麻長早晚酒一壺自歌還自賞

苦寒行沁州山中作

凌晨陟龜嶺詰曲怯躋攀撫時歲聿暮積雪蔽崇巒寒
生危塹裡雀啼枯木間綿衣猶恨薄僕從衣俱單路旁
有民舍柴門掩空山壯者散四方老者臥草菅海宇多
變故徵求日未閒營構一何急邊塵滿漢關壑深水不

流我淚獨潺湲憑誰叫閭闔早使陽春還

同沈生京李生舒華宿清涼庵

我從炎海來乃至清涼境陰壑草樹寒絕頂天風勁幽
懷自茲開老眼亦一騁白雲生洞口遠與諸村映曠哉
天地間此道誰畧領休文耽苦吟李生習禪定相對寂
無言意與山俱靜夜深清磬發塵夢倏然醒

題松谿書屋四首

達人屏塵垢日日向林麓偃仰岩壑間置書翻不讀以

道獵萬化機運洞伸縮默然坐磐石一鳥鳴高木

浮化萬山裏山色何青青更於最深處乃結一茅亭
谿徑饒芳草旦晚飯仙苓澹泊有如此曰惟養性靈

谿聲與松聲早夢寒驚破蘿徑露初晞步向西齋坐雲
生樹忽暝泉響山疑墮吟成二雅詩歌罷無人和

汲水自漱齒隱几讀陰符既以窺元化又欲定八區大
道無言象至樂在江湖時運苟不至且覽崑崙圖

訓董信溪雪餘枉顧

山園何寥寥雪餘枉高步自愧非戴家乃勞子猷顧呼
酒暢幽懷烹茶有隱趣徙倚矚烟巒瑤華綴林樹微微
霽景流天壤色俱素深擁初祖門清憶謝庭句苟非佳
客來茲意成淪誤言別日將夕悵望城南路

將赴上谷留別紀山二首

我為東齊人君為南楚客相逢晉水陽結交見肝膈絲
竹列廣庭嫵婉屆良夕自謂長如此詎知有行役行役
在塞門念茲傷魂魄

戀戀不能別乃至曠野中啣杯各惆悵日暮生悲風悲
風捲蓬草一西還一東塵世多變態後會安可同攜手
望雲衢愧彼雙飛鴻

春日述懷

曉齋春雨歇一鳥當窻鳴山雲入我座不知在邊城夙
心本閒曠偶無塵事營手把楞伽讀忽已忘吾生軒冕
是何物可以嬰其情君子貴得道誰能顧浮名

觀李山人海市圖

箇中何所有惟有海市圖我知山人心長與變化俱天
地蟠胸臆樓臺倏有無豈為蛟蜃宅本是神仙區秦皇
亦英主東坡乃巨儒空勞平生心不得到蓬壺昨日安
期生訪我跨雙鳧自言阜鄉亭密過帝君都又言塵世
幻滄海有時枯袖裏出仙籍獨見爾與吾去去凌飛虹
手中握玉樞誰云阻弱水若過東家壚堪悲軒冕客終
日在泥塗

述懷四首

自幼習耕釣足跡不離村長覽農桑書亦窺道德言祇
以家貧故始驅南北轅駕馬多顛躓末路怯騰騫去就
不自決其如負國恩上書解簪組吾將返故園

鯤鵬翔萬里鷦鷯在一枝大小各有適進退豈無時胡
為徇利祿縈縈至死悲榮公行帶索陶氏恒苦饑至性
苟無累貧賤復何辭歸去臥山中斯人良可師

澤蘭沿野徑鷓鴣鳴高柯感茲悲時序倏如流電過余
年方半百鬢髮漸以皤去日不能再來日寧幾多我欲

尋瑤草兼之種玉禾若待功成退誰揮魯陽戈
管寧東浮海范睢西入秦貴賤雖異致千載同一塵憶
其在世時不如隱者珍因之慕萊子歸侍白頭親所貴
在養志寧論鼎與茵長揖謝浮世冥鴻不可馴

沽酒與呂山人話舊

前年鄴城與君始相遇慷慨夜深言所期在遠慕聞
君返故鄉干戈滿道路我亦抱沈痾命危若朝露還家
無舊業生事同流寓薄田徧蒿萊殘書亦蟲蛀日夕卧

空園懷人望雲樹豈知寥落所君自遠方顧相別幾歲
時相看忽若寤橐中無黃金鬢邊色已素既以感朋好
兼之悲世務滄流不可回蟬鳴日將暮對酒且沉酣萬
事有天數

初至鴈門謁閔中丞

照任丘人

余本魯諸生未習戎馬事前年釋袷褐萬里向邊地秋
風起鴈門羽書日三至中丞燕趙豪臨敵有暇思幕中
集羣畫轅門列虎士亦欲效區區坐使疆場治但求干

戈戢勲名非所志

上元讌集以病不赴東荆人喻明府燕人于李

二廣文

微風韻春夕圓月吐城闌式讌偕流俗旨酒娛嘉賓
火樹明還艷絲竹間且陳燕趙多英客荆郢盡詞人
雄談驚四座擊節洽芳辰顧予寂寞士獨與藥爐親
今宵有高詠貽來慰病身

題媿非馬公巢雲亭

有序

結亭樹杪古今所稀欣然賦詩以明向往因及

小洞非曰闕奇

先生好事者往往弄奇怪所乘竹木車首尾作船態前
年造行窩看花隨處載世人無不笑達人無不愛忽於
柳樹上為亭團似蓋四圍無軒窓雲烟互而靄亭中何
所有酒杯長日在亭中何所為吟詩學馬戴亭中何所
見北溟與東岱亭中何所親山僧與荷簪祇欲遠塵寰
不為增氣緊我也作一洞狂放亦其最兩孔亘如環中

間頗不隘。竭來陳道人品題是仙界。冥心坐終夕。動靜俱無礙。百年湖海意。領畧須吾輩。秋風吹十里。初涼體則快。或飲君亭上。或酌我洞內。酩酊無不可。誰能求富貴。茲樂難具言。更以心相會。

田居柬李明府

自余解兵符。為農向桃嶺。病餘猶荷鋤。灌園初鑿井。所賴明府賢。蝗飛不入境。木棉徧平岡。瓜蔓交野徑。朝吹烟氣合。日落山村靜。時攜妻子來。矚此田中景。雜芳娛

幽抱寒蟲滿清聽往年亦此土人與歲俱梗感恩詎有
涯撫事寧無省是時已秋斂場圃家家整烹雞若羅珍
為黍當噉餅聞君欲枉駕老稚皆延頸

醉中放歌

同呂山人作

茫茫天壤內狂放有吾徒布袍不值錢當酒寧幾壺晴
空起雷雨把杯相叫呼烟雲滿郊甸龍蛇能辨無世態
亦如此富貴豈良圖管仲尚小器公孫非丈夫惟有劉
伯倫酒德耀寰區

春日訊喻明府

君有醫人術春來亦抱痾良以憂卹故不為簿書多吾
鄉沐休澤節候入陽和谷風吹廣野晴日動寒柯臥理
自高才心賞其如何意況本閒適端不廢弦歌我病偶
相似芳歲俱蹉跎寥寂仲蔚宅華軒幾時過

初春臥病答喻明府韻

玄英歲云謝纏綿仍負痾百齡今已半日月諒無多心
含萬古愁豈不滑其和春來散情性徙倚眊庭柯賢愚

會有極孰如冥運何開門得瓊藻慷慨一悲歌道喪昔
已然不必問蹉跎祇當飲美酒莫使歲華過

環縣別計簿蕭郎中

大亨泰
安州人

君來自慶陽我先宿靈武前路入沙磧況為風雨阻館
舍對層臺蒼茫閱今古愁雲黯蕭關江聲帶鼙鼓憶昔
白衣士談笑恢疆土君住泰山下日夕吟梁甫跼蹐者
何為王事方靡盬逢時樹勲名桑劉口不數我鬢已刁
騷逝將尋巢父山城無酒家別悰覺其苦

醒後聞磬聲

冷然響清磬我思良悠悠披衣一起坐明月懸高樓遙
遙目天宇空闊萬象收此時無人言獨與太虛遊河清
不可俟天運倏已周冥心入無極真想在浮丘人生亦
晝夜身外更何求

還鄉

去鄉十五載今方返敝廬日暮望城郭慘淡心何如存
沒悲親友蕭條歎里閭舊日同遊人攜觴數過予既慰

干戈苦再驚鬢髮疎流年何超忽世事笑空虛余豈真
隱者迂拙宜郊居是時春聿暮柳色拂長渠自顧疾病
身猶能荷犂鋤晝耘桑麻田夜讀蒙莊書

喜呂二山人中父見訪

客自越中來滄江訪逸叟念別倏經年新詩得幾首嗟
君衣上塵笑我門前柳世事多翻覆各掩談天口留君
且莫行牀頭有黍酒

甬東篇

有序

呂二山人四明高士也舊號東野余以犯古人
又氣韻瀟洒不類孟忽憶古詩云四明有狂客
風流賀季真四明乃甬東郡也遂更號甬東并
贈小詩

四明美山水我聞已多年八十二峯雲日夕帶甬川中
有季真宅松竹凌蒼烟高風與勝跡萬古桂林泉明時
有呂子逸氣何飄然雖在甬東住未買甬東田竭來遊
海內聲詩盛流傳山巾與野服見者稱賀僊將欲尋瑤

草孤踪寄八埏時人或未識觀我甬東篇

和王憲副西石宿左衛見懷

楚人之語

寒夜客何如更堪喧鼓角亂山殘雪裏能無動離索
羊河不隔夢飛去共君酌兩地結孤悰燈花向人落

鴈門述懷訓徐王楊三君子

塘基線

黯黯高闕雲惻惻鴈門樹我來夏方初不知秋已暮時
序固其然鬢毛愁則素敷名愧流輩鄉山夢裏去孤抱
竟誰陳援毫述短句

邊塵秋不起公餘即閉關所慕在沈靜日夕對南山長
空寒鳥沒遠岫孤雲還世途老難行因思江海間匪君
有道氣何由展心顏

滄海不西流日馭無東輓如何百年間愁與病相積我
有萬古心傾倒向三益徐孺高士流王猷尚標格揚雲
作詞賦雅調宣金石

秋風吹紫塞木葉不能聞慷慨空如此多愧武安君平
生秉微尚歸夢一何勤手弄玄池水足躡靈嶽雲終當

謝明時我言豈徒云

乾陵

毒霧生陰壑悲風吹曠野殘燒無人收山高土色赭當時信奢麗遺趾尚豁間蔓草纏翁仲積沙沒石馬突兀七層碑字蝕詎堪打柏盡根亦無泉涸水不瀉彼巢敢肆虐始悟漆銅假文景莽平原過客拜陵下

李生寒士也有一牛代耕今斃矣詩以慰之

善賈不藝桑巧宦不謀生念爾蓬蓽士終歲勤躬耕得

牛若良僕反視書劍輕不忍服車軌詎肯供犧牲春日
起農事物命一夕傾問喘屬何人扣角罷歌聲已荒長
沮地還傷田子情存歿歸冥數物我由來平何如捨此
去慷慨立功名聖賢不務稼獨能享大烹

示祈雨官吏

官吏閔民旱祈禱意頗敦六月仍不雨四野淨如髡呼
前告官吏恐未究其源自從前歲澇秋禾無一根正賦
不能入兼之工役繁政令如水火徵求到雞豚今日賣

其子明日復鬻孫子孫已賣盡里胥還扣門守令猶不知況能達至尊人道良多舛天心豈少恩所貴修政事及時救元元愛人與節用魯叟非空言

呂憲長惠余七寶丹云服之黑髮延年惟與豆乳不宜余幼寒素獨與此味相善每呼為淡友

戲作別淡友詩

時中清
豐人

歲晏起秋風羣芳倏凋悴感此嗟余生反為形所累偶得紫朮方服食仙可至鍾鼎誤時人吾將從此逝獨有

貧賤交如何一旦棄

漫翁詩

有序

萬歷丙申季冬十日夜予夢兩吏持文書招予
至一大府府門尚未開予索文書觀之乃漫文
非予姓名因辭回醒來思之漫者有曠遠之義
又有悠緩之義於予姓為近文則非其所長或
漫然為之而未能成名於世耶古人有以漫自
嘲者予非其倫今年八十更號漫翁作漫翁詩

子美稱漫郎次山號漫叟兩公皆偉人斯名傳不朽予
本疎闊士且與病為偶性惟率其真名不居其右雖嘗
為文章不習韓與柳詩韻尚未諧況能辨好醜亦嘗涉
世故世故良難剖軌事與掄材舛錯恒八九自信惟此
心得失兩無有所幸遂歸來惟與鹿豕友耕也不知獲
漁也不用苟富貴若浮雲詩書成敝帚於今年八十萬
事空回首茫茫視天地未知誰長久仍欲惜豹文仍欲
競雞口縱得千載名何如一杯酒歲月自盈虛吾生無

譽咎從此稱漫翁可並古人否

死別離

有引

晉唐人有悼亡詩傳之後世尚不能讀予為死別離詩二首非敢比擬前哲亦惟宣洩幽懷云

爾

生別在遠道思之令人老白髮倘相逢猶足慰懷抱死別向泉臺墓門何日開豈無眼前人思君痛難裁

生別如秋鴈春日或相見相見既有時腸亦不能斷死

別臥荒郊東逝水滔滔思君如逝水寤寐心為勞

長山王同年學博過訪因談醴泉寺贈以小詩

君家長白山中有醴泉寺垂老不能遊笑我緣何事君
今訪我來更復談清致一泉生峯頂亂流到平地范公
讀書堂四時有蒼翠豈惟山水佳其人亦相似名高齊
魯間羨君從早歲同榜稱白眉詞林為赤幟地靈人亦
傑相傳豈無謂禮闈久抱屈復罷催租吏橫經向何所
人文觀盛世崇卑不足論所貴有胸次酌君一杯酒相

看各意氣白雲逐君來使我生遐思

長干行二首效齊梁體

妾住清谿口門臨江上柳柳花飛似雪惆悵與郎別
記得初相遇門前花滿樹只今已落花郎去宿誰家

存家詩稿卷一

欽定四庫全書

存家詩稿卷二

明 楊巍 撰

五言律

行板橋山中

時赴晉臬

山色橋西處清幽與世分
霜崖出野館苔徑入松雲
巒氣晴還濕水聲斷復聞
隱居惟此好詎敢負明君

八月初八日飲劉叅戎對月亭

亭靜月娟娟清光此處偏關山元有曲河漢正初弦影
動金樽裏寒生寶劍邊不因烽火少安得醉華筵

宿太安驛

屬太原

長路客心倦懸崖暮景斜壑深雲並黑夜久月初華短
燭啼山鬼高風動塞茄王城知漸近猶自夢烟霞

盤陀晚行次韻二首

歲晚猶行役山程帶雪高客愁雙鬢改國計此心勞暗
澗冰衝斷危峯天植牢今宵應不寐霜月滿亭臯

雪後風兼起山空路轉寒
豈堪多病體猶未歇征鞍下
驛燈來少盤河夕渡難
海鄉茅屋在高臥羨袁安

過鷓子峪

在北樓口

十里松間路松聲雜鳥聲
山雲多變態野水自縱橫
古木題詩坐懸崖下馬行
可憐幽絕處只是近邊城

武鄉

以催科至

萬壑斜陽裏寥寥一縣樓
所經多亂石幾處是平疇
甲嶺雪長在漳河凍不流
民生困已極那忍更徵求

松林寺留別諸公和衛源方伯韻

孟淮汴梁人有詩名

窈窕山邊寺青青松樹林豈堪虛寂所翻動別離心日暮晉城遠雲愁燕塞深前途知己少袖裏有高吟

秋日寓塞上逢老母壽辰

悵望空垂淚淹留豈為官君親情獨苦去住意俱難野闊山雲暮風高塞草寒幾時拜家慶萊彩一承歡

北樓口留別許叅戎

擾擾烟塵際離觴對晚暉悲風嘶去馬落葉上征衣野

燒臨河斷寒沙帶雪飛願君思滅寇慷慨振軍威

役役

役役憐終日驅車西復東客心生塞草世事入秋風
意向簿書倦愁因疾病空祇應滄海上高坐學漁翁

王義鎮用麥飯

我過王義鎮白日掩柴荆颯颯風沙起淒淒鳥雀鳴
館人供麥飯黯色似藜羹正此憂民瘼一餐無限情

送黎樂溪憲副轉甘肅太僕二首

白嶺千山外黃河萬國西塞雲秋渺渺沙草日淒淒遠
地難離別邊城尚鼓鼙張王名未泯駟政定思齊
帷幄運籌者翻令在牧芻憂時雙鬢短去路一琴孤已
振蘭臺紀應蕃沙苑駒誰云閒散地麟閣佇新圖

柏溪書屋二首

多才漢司馬高調謝臨川業在青山裏人來滄海邊論
文驚琬琰把酒向雲烟未遂卜居志空歌伐木篇
入夏門長閉為園道不疎閒將流水引夢與古人居野

鶴窺丸藥山精聽讀書尋詩自來往風起柳塘初

忻州雨夜

世慮已難遣况當旅館秋寒城夜半雨故國夢中樓河
漢幾時曙蛩螢增客愁雁門明日路鼓角入邊州

石州陷後作四首

人與家齊壞城空真若屠百年無此變萬命亦何辜天
為冤魂黯地將肝腦塗夜深聞鬼哭不獨恨匈奴

石州古名郡一日化為灰敵騎豈飛到城門不戰開腐

儒終誤國盛世自多才好用廉頗輩空談何補哉

世事料如此吾民禍早嬰山川猶帶血草木亦吞聲白日爲雙下危塗旅不行憑誰訴真宰徒爾痛蒼生

自昔聞兵火傷心在目前生存猶墮淚死去益堪憐城壘酸風日干戈積歲年請纓還我輩悔禍是皇天

逢劉吉士鈺庵時謫戍雁門

歎爾詞林客如何在塞門蹉跎頭漸白慷慨氣猶存把劍論時事吹燈照淚痕金雞聞欲赦早晚沐天恩

祁縣贈閻漫川同年

吾兄乃達者早歲向烟蘿世事今如此浮名竟若何人
來光水少田傍憤山多醉後惟高枕不聞種豆歌

太原除夕

今夕山城裏客心主轉煩年光分半夜燎火閉千門續
酒惜殘臘感時念故園所歡吾母健萬事不須論

元夜曹學憲紀山枉過有述

三年三晉地臘盡復春宵忽訝年華改兼悲故國遙文

章漸往哲出處媿清朝把酒疎燈下君來慰寂寥

登恒嶽五首

恒嶽來何所正當北極中早年聞勝跡老我謁玄宮雷
雨流晴壑松杉撼晚風靈山瞻禮罷懷古意無窮

南去臨全晉北來控朔方千年形勝在萬壑松雲涼上
界金銀闕懸崖薜荔房乾坤回首處冀野路蒼蒼

不覽羣山徧寧知北嶽尊於今歸聖代自古障中原日
月通明晦烟雲互吐吞秋高臨瀚海萬里辨清渾

昔人巡狩地風景有無殊恍惚危峰墮陰森古殿虛夕
陽岩五色虎峪柏千株依舊玄天月泠泠照玉除

層崖獨立處萬木秋風寒水作玲瓏聽山如菡萏看盧
敖元有杖殷女尚留丹寶籙肯相授明朝即棄官

春日病歸先寄冰壺楊明府二首

今日還戎馬空餘疾病身豈能當國士終合作閒人塞
路天仍雪海鄉柳已春所欣沾惠化裁此報安仁

長路看山色其如久客何明時辭印綬垂老向烟蘿花

憶春城發門憐芳草多因君歸興好到日聽弦歌

再過柏井驛將別任柏溪鎧

十載題詩處青山滿驛門與君今日別白髮向中原客
路看春樹寒燈照夜言明朝故關上回首一銷魂

雁門九日無興登高作詩二首

九塞行將徧三秋歲欲殘故鄉歸未得客抱向誰寬雲
送臺山暝風吹關樹寒干戈正擾攘何處可凭欄

把酒不能醉登高奈所思豈堪雲斷處正值雁回時風

雨樓煩國關山李牧祠寒花無意賞况復鬢毛衰

秋日飲王計部擬蘭亭次韻二首

基青
州人

訪汝亦何暮淒其池館秋風迴黃葉舞天淨碧雲流詩
句輸摩詰客心憶少游相知不痛飲歲月若為留
池亭當勝所烟淡更宜秋勾注千峯出滹沱幾派流酒
因愁易醉藝以老難游不是同鄉井誰能盡日留

寓安邑

回首同安路忽驚歲序徂腐儒慚餽廩多病夢江湖涑

水寒雲合條山夕照孤荒涼城郭裏惆悵禹王都

懷來城逢四明呂二山人二首

飄飄江海客此日滯燕關裘馬狂仍甚風塵氣亦閒尋
幽秋過寺得句暮看山我正悲羈旅逢君一解顏

南國亂不止客心其奈秋一身來萬里避地獨登樓燕
樹著霜變羊河抱郭流明年與爾去滄海老漁舟

和王侍御自沁州見寄兼送還朝二首

隆慶元年

柱史吾鄉彥高情奈別何有書來晉水無夢不漳河亂

後征徭急明時諫諍多老懷關世事况聽大風歌

近報干戈息遙瞻日月新乘驄趨北闕遺惠泣西人
道路千山霽鶯花上國春王褒能獻頌不祀碧雞神

宿土明村

北來三百里纔見此孤村自有干戈後惟餘老稚存
山川空對客風雪不關門隣壁何人住哭聲夜尚吞

汾州贈孔文谷先生二首

愧我栖栖客得升賢者堂早聞經濟志今見鬢毛蒼兩

漢看文體終年入醉鄉田園開背郭人擬輞川莊

早上萬言書曾傳玉殿臚才非時所用心與道相符注
易山名卜為農谷似愚不因賓帝胄事業詎能無

故關別任柏溪

關門從此別對酒各沾衣芳草臨歧路千山向夕暉交
情惟汝在世事與心違後會知何地休令音信稀

過青蒿鎮

東有天
涯山

野店愁過日悠悠驛路斜黍禾將歲暮密洞幾人家雷

響千山雨風啼獨樹鴉客心向誰好關塞是天涯

春日懷歸

岸幘花前坐忽同林下居春風吹戶牖芳草徧庭除嗜
酒無餘俸多愁懶著書歸歟桃嶺上兄弟共耕鋤

柬張前溪大叅

松洛陽人

為問張平子客懷近若何悲秋心共苦憂國鬢應皤北
嶽雲中樹桑乾霜後河懸空寺裏約九日可相過

過懸空寺

寺在渾源州磁窑口

一寺空虛裏危欄高幾層懸崖惟度鳥無路去齋僧雲
隱多羅樹天垂寶月燈塵心何處覺孤磬下峻嶒

冷泉關別張安軒少叅徐南野僉憲二同年

羨汝同南去嗟予獨北還離筵臨野水客路入秋山世
故誰相語塵心自不閒那堪分手處日暮冷泉關

岩畔僧居

岩畔疑無路禪關向此分金沙高映日貝葉細翻雲入
定妨猿嘯焚香下鶴羣何時乘興至清磬月中聞

望箕山懷許由

箕山棲隱處逸駕接崆峒孤塚懸雲外芳名落世中聖
朝猶不仕潛德更何窮余亦塵埃客徒懷高士風

聞喜公署言懷

寂寞淹山館寒城下夕陰迂懷空慕古撫事已成今路
遠鄉書少天高秋意深不堪客思苦月出更聞砧

宿吳城驛

孤城夜裏到雪色正漫漫亂後人家少山深燈火寒悲

風吹古樹入夢似驚湍明日黃蘆嶺彌知邊路難

行靜樂梁嶺山中

岩壑行來好杉松畫不如經年無客到何處有人居石
古苔生徧泉香麝過餘買山能得此亦可結吾廬

路中逢立春

簫鼓迎春日喧喧客裏聞馬消邊地雪旗暖晉山雲隱
隱川光動微微柳色分田園正好去莫待有移文

過石嶺關

石嶺月初上登登僕從勞山城秋路遠戍鼓夜深高驅
馬臨重隘感時換二毛風塵頻看劍無夢向江皋

出京別諸公

萬歷庚寅

春日去都門河橋氣色溫為因乞骸骨寧不戀君恩白
首家千里紅亭酒幾尊治平諸老在深足慰離魂

夜渡滹沱

夜渡滹沱水茫茫幾里寬舟行人不覺波動棹聲寒彼
岸千燈候戍樓曉月殘趨朝正此際老矣別長安

近家志喜

還家春未晚草色尚萋萋漸覺世塵少忽看鄉樹低
候門喧稚子炊飯有山妻從此滄江上別開桃李蹊

過王戍店感舊

當年沽酒處此日一人無回首悲陳迹浮生愧老夫
長途春草徧小店野烟孤忍見旗亭柳風前鳥自呼

霑化夜集感舊

別去憶多年張燈惜此筵故人嗟老矣吾鬢亦蒼然
雨

響殘秋地城分不夜天從今數來往同種海西田

過忻口

落日臨寒渚悲風動戍臺雲隨長路去水自亂山來白
髮身將老蒼生志未灰沙禽鳴向客旅思轉悠哉

逢楊風軒教諭時風軒罷官久矣勸之東歸故

鄉

前歲一官罷於今尚遠途鬢毛驚盡白囊篋想應無老
更攻詩翰狂猶到酒壚東歸舊業在三徑未全蕪

宿穆陵關效杜荀鶴體

野館千山裏，頽垣少四鄰。
雄圖追往古，衰鬢憶吾親。
岩月望不出，秋蟲聒殺人。
關門侯明發，南去有通津。

赴南都登太岳二首

駐馬登東岳，憑高辨四溟。
始知人世小，不斷此山青。
樓閣秋孤出，川原晝杳冥。
將尋孫復隱，忽忘有嚴程。

梁甫名仍在，登封事不磨。
逢人詢古蹟，覽勝欲狂歌。
匹練吳門近，豐碑漢代多。
還能舒老眼，萬里見滄波。

樂城讀吳川樓給事壁間詩次韻時川樓猶謫

宦

青瑣同袍友知從此地眠朝中傳奏疏客裏見詩篇大
陸秋風急長河夜雨連賜環應見近猶自著吟鞭

答溫中丞見寄

如璋時余寓
平定侯代

留滯春將晚思君曠所期荒城書到處白日夢回時老
病醫難得兵符謝已遲歸途定相見應嘆鬢如絲

清明後一日劉通政過嶺園

希孟

嶺園逢君夕春風食尚寒不言別後事先問聖躬安存
歿悲諸老去留任一官雲林最深處相對酒杯寬

中秋嶺園對月

為問林塘月如何分外明轉憐河漢近偏映竹松清疑
有羽人駕杳無天籟聲庾公興深淺茲夕可相并

寄題屠赤水空明閣二首

隆能文
負屈

聞君起草閣賽我半間樓深喜居相似翻悲路阻修江
雲晴亂入山月曉還留偶記少陵語乾坤到十洲

高調已絕塵林間閣又新谿山且礙眼名利豈關身倚
檻觀無際談玄坐至人漫言不識路夢遶鑑湖濱

贈呂山人劍

寶劍帶龍文空藏未策勲呼童開玉匣雙手贈茅君江
海獨行處鯨鯢應散羣夜深漫拂拭光在斗牛分

病中喜雨

海國經年病山堂少客過平明看細雨長日對垂蘿世
事渾宜嬾生涯豈在多老來厭兵甲一洗望天河

三家村

海色暗荒原蕭條自一村日高不見火人到始開門屋
比巢居陋儲無僦石存猶聞催兩稅對此欲銷魂

首尾吟二首效宋人體

我思堯舜時察察盡師師猶謹危微念長歌喜起詩中
天懸日月萬古仰綱維擊壤人不見我思堯舜時
我思孔孟時人得聖賢師六籍咸遵古七篇半引詩無
非明帝道總是正天維異說紛然出我思孔孟時

得二鶴

本是雲霄侶伴予守故丘敢嫌雙口累似與二僊游舞
遶花間徑唳高塵外樓身輕如有日跨鴈向羅浮

郊居秋興

郊原淨秋色幽事甚從容不厭山僧過每於田父逢為
橋通野水伐木出寒松更願烟塵絕終身一老農

柏林寺別王計部寺即李晉王葬所

園陵今作寺秋草向沙陀事歎十年往人憐兩度過山

卷二
川明霽雪鐘磬帶烟蘿於此別知己尊前意更多

春日平定侯代次韻訓任苗二子

如何已解綬猶此客天涯為有求羊過頻開早晚衙詩
人情自好塵世事堪嗟遙憶嶺園裏春深樹樹花

贈陽信武明府

我讀循良傳惟君似古人愛民不啻子接士儼如賓野
潤潘花徧城春陶柳新聖朝正求治早晚侍楓宸

重過霽化范公園

人憶羲皇上園開渤海西以予別去久是路再來迷雨
徧桑麻野春深飛李蹊平生一范老不見意悽悽

南山上人來訪送以小詩

寂寞誰相訪師來千里餘不言心自了一呪病能除歸
路石仍滑世緣老更疎從茲門再掩草色徧郊居

贈車鎮村族叔三老

吾家養齋老所性好清閒薄地不盈頃草房只數間宅
隣廣武墓樹接烏鴉山已住郊原外柴扉長日關

存家詩稿卷二

欽定四庫全書

存家詩稿卷三

明 楊巍 撰

五言律

九日同呂山人登覽曠亭

極目川原外
放懷天地間
千林秋葉墜
萬里塞鴻還
風雨詩偏壯
茱萸晚正斑
不因君落帽
誰解是龍山

題介休王醫杏林卷

賣藥兼求道年年海上過
應人渾偶爾濟世有諸科
術異泣神鬼心閒到薜蘿
春來聞種杏萬樹繞汾河

題馬愧非巢雲亭

亭子起何所高懸古柳間
為聆黃鳥語兼愛白雲還
杯外分平楚座中到遠山
襟期有如此能望不能攀

壬申九日登覽曠亭憶舊會
兼喜谷司馬初還

次前韻

往事真如昨登高復此間
歲時人半老江海客初還
暮

雁聲偏疾寒花色白斑不須多感慨東望有牛山

送圓上人還五臺

清涼古佛地有屋傍西臺
磧雪春仍積岩花夏始開
已知苦行滿想見文殊來
二虎倘無恙為予問訊哉

庚寅九日登高

林下登高處飄然興不同
迎霜樹五色對酒菊多叢
世事浮雲外風流落帽中
莫愁秋漸晚天際有歸鴻

閒居贈五臺僧

浮世豈忘我衰顏無片能絕交惟獨往問字幾人曾門
徑長青草軒窗挂紫藤莫言少客訪見有五臺僧

元夜病足

寓平定
侯代

春到人猶病寒燈臥似吟藍輿他日事藥裏異鄉心歲
序驚沙塞椒花憶故林歸期仍未定滄海夢中深

家居次呂山人

罷官真是遲多病老來時難抱灌花瓮空臨洗硯池閑
門春草長伏枕隙駒馳潦倒不堪用非君孰我知

病足自遣

仰臥長終日空齋澹所思何須窮海嶽祇貴得希夷真
性能無損凡軀未足悲文昌詩句好身病是閒時

答王龍門見寄韻

自向山中臥蕭條門徑秋市沽愁不醉藥品病多收世
事歸詩卷生涯有釣舟聞君欲相訪家在海西樓

月夜至山園

而我愛光景山園夜亦過微風醒鳥夢明月澹烟蘿露

冷蛩聲少亭空樹影多此中得佳句高詠向星河

秋月吟

清光正東上大火已西流皎皎四時月如何偏愛秋玉
繩低草閣金露濕芳洲遙憶仙人宅五城十二樓

秋日閒居三首

笑我起居處寥寥一竹床長貧諳性命多病識行藏地
與紅塵遠秋憐白日涼山僧久不至木落井西堂

漫道無生理秋天亦苦予倩人斲藥品伐木結寒廬酒

採菊花釀噀收桐葉書所歡遂間散名利將焉如
荒徑無人到柴門帶晚霞不知身抱病且喜菊開花買
鶴供詩料鬻書送酒家秋來禾黍熟垂老此生涯

還家逢九日二首

自喜一官罷寧悲三徑蕪懸車少客訪入戶有僮扶黃
菊寒仍在青山道不孤老來慵戲馬高枕臥江湖
芳辰來故國秋色徧柴門正值菊花候新開竹葉尊晴
雲高雁鶩暮雨長蘭蓀偶誦閒居詠斯人可共論

和呂山人病酒

酒病嘗難受山人其奈何詩仍枕上得飯已午時過問
字良朋集閉門芳草多忽聞發高興予亦散微疴

五月廿七為誕陶兒日時寓都門聽覆試念之
作此

兩年誕汝日皆在客途間正屬炎蒸候其如游子顏科
名是何物天性自相關從此堪偕隱雲深馬谷山

月夜

齋中人去夜松際月來天自擊羅浮磬高歌招隱篇軒
窓殘雪在河漢數星懸鶴夢呼不起吾心誰為傳

海鄉聞雁

平蕪霜露合孤雁尚南征影落黃龍渚聲淒魏豹城殘
雲疑路斷新月似弦驚十載關山北曾傷故國情

閏八月十五柬王高二君以前月惠酒病不能
會

正當延賞夜一病獨成眠北海尊空在南樓興杳然清

宵嗟已失白月喜重圓茲夕誰能負星河萬里天

戲題三角亭三首

茅亭獨面東想像總無同形出方圓外數兼天地中聯
詩宜石鼎講道去尸蟲混世當如此寧論拙與工

何方問蓬島塵世路多歧獨向小亭坐還如上古時斜
開蔣訓徑靜遣季文思盡日看春色萋萋資菜蔬施

前後悲身世於今記得曾年光何鼎鼎人意尚稜稜白
日依簷轉昏星傍溜澄惟應招總印共此閱傳燈

戲題草屋三首

爽塏非吾願，結茅獨傍村。
經營謀素拙，巢窟意猶存。
俗士頻迴駕，高僧常到門。
此中風日別，笑背有餘暄。

土壁須臾就，柴扉容易開。
海鄉乏木石，棟宇借蒿萊。
尚恐秋風妬，應無燕雀來。
平生懷栗里，八九亦多哉。

茅茨高幾許，所願避風寒。
雅稱蓬為戶，偏宜竹作冠。
自

甘芻狗彘人，以臥龍看深。
感谷峰老，為予賦考槃。
于宗伯寄

題有俗殺牛
橋莊之句

秋日郊居二首

嶺園寡塵鞅，淒然秋日心。
呼僮移野菊，留客醉霜林。
落葉悲時序，浮名笑古今。
靜言思化理，世慮盡銷沉。
昨夜涼風至，轉憐景物新。
已蘇多病體，況復少烟塵。
歲稔登禾稼，秋高有蕨蓴。
滿然無一事，猶念未歸人。

登新興里黃臺

臺起縣中央，登臨意獨傷。
愁雲連海暗，蔓草接天荒。
幾里無雞犬，迎冬見雪霜。
憑誰問民瘼，村落滿斜陽。

重過馬谷山村

山村重到日風景益堪親
家遠唯宜病境幽豈避人雲
開山洞曉水漫九河春投老此中得當年枉問津

送汪山人游山海

自是江湖客猶然變姓名
妻孥貧不問書畫老逾精
雲黯秦王島山高孤竹城
同誰登碣石醉看海濤生

贈李廣文移居蕪呈王宋二丈

定爾嫌車馬還因欲卜鄰
蕭條委巷內來往向誰頻
門

徑不除草圖書長傍身宋王家咫尺俱是素心人

和呂二山人君子居韻二首

寧波人

渤海非東海窮鄉奈薄游慚予為地主愛汝獨風流野
色蓬三徑濤聲夜一樓隣人亦知德送酒過牆頭
此地誰堪隱君來就我居若非耽寂寞寧不厭樵漁綠
柳村邊舍黃庭枕上書相看吾道在世路竟何如

答呂二山人雨中問病韻二首

漫說憲非病空慚回庶幾家貧人臥穩橋斷客來稀秋

草恣侵徑寒雲伴掩扉
明朝野水落依舊釣漁磯
已向山中老寧論世上功
爾詩久作祟吾道豈云窮
百畝桑麻雨一溪楊柳風
生涯亦自好端不坐書空

立秋後一日董劉二君過訪

杖藜偶爾出忽見兩高軒
不意索居處得聞長者言
是時流大火傍樹倒清尊
落日遽相別依然又掩門

邀諸學博賞菊

佳菊偏宜晚入冬
始落英寒增茅屋色
雅稱野人情霜

露清三徑壺觴盡一生廣文能好我騎馬過柴荆

郊居效樂天

老去無餘事徜徉草野間
高蘆移當竹亂石疊為山
客到即呼酒僧來同閉關
不因逢盛世那遂此清閒

送鄧廣文之任崇陽令

文旆忽南去老懷奈別何
仙鳬攀未得荒墅更誰過
客路九江遠楚城三戶多
一言堪贈否佳政在弦歌

送孫司訓之任良鄉學諭

幾載借荒城為師獨有名那堪驅瘦馬猶自戀諸生月
上蘆溝白風傳黍谷清莫言官尚冷已得近神京

雨夜有感

諸生時作

白晝又黃昏更深未掩門人垂燈下淚鬼哭雨中魂雙
鬢愁將老一經還自溫寥寥長夜裏心事與誰論

寄董僉憲閒居二首

邦政有邊才

聞君已解任投老向青齊結屋長山北買田渤海西花
應栽滿徑藥想種成畦處處堪行樂春來酒自攜

濟世須安石東山豈合歸尚存韜畧篋新作芰荷衣紫
塞名仍遠蒼生志不違長春高臥夜猶夢羽書飛

長春董君

名園

寄呂山人用韻

殘冬仍寄食念爾老無家跡尚如飄梗情多似亂麻
綈袍誰見贈魯酒自應賒聞作王門客筆頭想夢花

病中曹子見過

長日閉門臥衰年懶讀書貧惟安所遇道欲識其初鶴

跡山房滿松聲藥院疎不因君問病誰肯過吾廬

秋日劉別駕偶過

近午猶高臥小車說到門披衣迎好客問婦有清尊市
遠盤食少秋深松菊繁文章與出處身外不須言

雨中和張山人懷歸越中

故里何年別魚書隔歲沉囊無十日費鬢有二毛侵交
誼原非淺酒杯莫厭深西園聽雨處還似越江潯

和呂山人遂初堂韻

茅堂得詞客相對兩忘機以彼心常逸慚予病始歸漁
樵元舊業荷芰有初衣堪向此中老回頭萬事非

寄淮陽張給事

侃

予多張季鷹行與古人并諫主曾焚草為詩獨擅名淮
陽山水郡海上薜蘿城見面何由得空勞夢寐情

九日憶亡弟巖

自汝棄予後出門益覺難無人陪笑語對酒獨悲酸荆
樹霜中老鵲鴝原上寒茱萸雖滿把含淚不能看

醉臥讀高蘇門詩

閒居長是醉高枕任吾欹
嬾慢心方得蹉跎老豈知
北窻風到處深樹鳥鳴時
世事一無好猶耽陶謝詩

越中三高士飲王左史莊贈此

左史能延客况聞高士名
盤桓輞口墅登眺古時城
聽鳥管絃廢看花羅綺輕
夕陽猶未返應待月華生

南園刈麥

刈麥向南園城中不異村
晴風低乳燕夏日滿衡門
豈

獨餬家口且思供酒樽生涯誰謂薄郭外有雞豚

夏日野塘泛槎

十畝野塘裏浮槎亦勝遊不知三伏暑渾似五湖秋映
酒垂紅蓼傍人起白鷗因思西里泊毒霧若為愁

雨中客自濟南惠石與竹榴

移將華頂石寄我海邊村已適樂山意况兼花木繁風
光分北渚雨氣滿西軒從此獲三益恍同靜者言

三益自東

坡來

題趙子冲玄稿

嗟君狂者流一第竟悠悠見客少青眼吟詩欲白頭
谿山無世態花鳥共春愁從此聲名著前身趙倚樓

雨夜董信溪過訪

臥病滄江上柴扉晝不開况茲風雨夕乃有故人來
遶屋吟黃葉疎燈照綠苔平生丘壑意共盡掌中杯

秋晚桃嶺再集

已過重陽日風高寒更催菊殘猶待客病後尚登臺萬

木霜中落浮雲天際來祇應拚一醉騎馬夜深回

春日

春日更多情風吹杖履輕欲聆黃鳥囀獨傍綠楊行遠
甸陰雲合孤村花木榮偶然逢野老邀我坐柴荆

送孔松崖道者

是吾夫子後自幼獨修仙心注形骸外道窺天地先蓬
萊知遠近歲月自推遷惆悵此時別歸來幾百年

送程尉還蜀

與君萬里別忍見柳條春已恨罷官早兼悲為客貧猿
聲來峽口草色暗江津想就嚴平卜行藏不在人

起巡撫陝西

嘉靖
丙寅

一身曾許國詎敢顧其私捧檄寧不喜絕裾還自悲朝
廷多難日臣子請纓時早晚干戈定歸來慰母慈

冬日喜韓紀善過訪

桐蒲臺
人候補

嘆爾王門客長裾未著身遊梁終授簡訪戴愧非人雪
散遙林色杯傾大海濱不須論出處南北正風塵

秋雨宿黑石嶺

嶺險藤迷路山高石作城
片雲何處雨孤客此時茅
屋幾家住秋風半夜生
旅魂愁已絕况聽鼓鼙聲

安邑逢閭給舍二首

救張總督杖歸

青瑣同趨日聲名汝獨先
別來多歲月老去阻山川
杯酒還今夕風波憶往年
五雲回首處相對一潸然
聞君高臥處門向翠微開
野徑葡萄熟山橋麋鹿來
閒居應作賦治世孰憐才
余亦思歸者滄江有釣臺

早秋登龍門城樓二首

朔塞樓頻倚新秋天乍晴雲山兼日色鼓角帶邊聲路
有元人轍臺餘漢將名楊公石柱在極目舊開平

指點雲州地真為漢北門八城臨大漠一路向中原晴
日山川映秋田黍稷繁文莊經畧處父老至今言

覽壁間北嶽詩憶舊遊

絕頂曾獨上乘風凌紫烟採芝秋峪裏謁帝夕陽邊瑤
闕頻回首塵寰動隔年棄官何日去空誦白雲篇

紫芝
峪夕

陽岩皆
北嶽景

經順聖川

野曠行人斷風高戍鼓鳴青山隣巨敵白日閉孤城戎
馬千年地江湖萬里情不堪征戰後極目一沾纓

過響水堡

塞水合流處聲喧十里繁乍聞堪動色相對未能言東
峽鼉鼉怒驚濤日月翻祇應阻邊馬不得入中原

即事

嘉靖
壬戌

世事渾無補歸心祇盡眠飛來何處雨一洗漢山川
海宇豐登日宰臣罷去年單于猶未歇誰為勒燕然

答王少叅見懷

惟寧關中人

我豈揚雲侶君同王粲賢憤時應仗酒投老是何年
擾干戈地淒淒雨雪天不堪客舍裏獨誦烏鳴篇

對山亭雪後

在陽和

雲帶高峰好況於雪後看澹烟飄戶牖清景似江干
塞遠人稀到亭孤歲自寒獨愁防戍者猶未解征鞍

小天門

疊嶂迴環處桃源恐在茲雲從馬足起藤向樹頭垂
磧水喧迎客岩花笑索詩殷勤留姓字記我獨來時

同王少叅遊清虛觀四首

徑轉孤峯外霞明仙苑邊瑤華開幾世丹竈閉多年
洞古雲長合堂虛日獨懸登臨有王烈共詠紫芝篇
逸思駕天風飄颻出半空山川雲日裏樓閣畫圖中
洞隱千年鹿潭飛萬里鴻平生慕仙蹟此地即崆峒

金扉凌倒景玉女儼層臺地靜人同鶴峯奇錦作苔亂
雲行處起清吹坐中來仙駕杳不至誰將寶籙開
山晚鳥猶吟窮幽此日心危途愁作客勝境欲抽簪紫
礪松風滿瑤壇花霧深歸來應夢到縹緲翠雲岑

邊城見燕子

寥落邊城裏還看燕子來主人寧見妬蓬戶定頻開地
迴巢難就風寒羽易摧翩翩懷舊侶何處傍池臺

左衛秋日候王楊二君不至

關雲看欲暝離思我何如野燒驚沙雁霜風落塞榆論
文心正切籌敵計猶疏不醉今宵酒空傳前日書

榆字
依洪

武
韻

九日寄王少叅

可惜重陽候年年客裏過登臨吾不愜懷抱爾如何落
日黃榆滿悲風紫塞多無由一縮地把酒慰蹉跎

九日登高

大同

已作雲中客更登塞上臺風塵回老眼節序託深杯碧

海雁行斷陰山雨氣來故園今日菊惆悵向誰開

春齋漫興

遠地無人到春風憶故林
傍簷獨鳥嘯積雨衆芳深
中散琴爲侶山公酒是心
欲騎黃鵠去萬里孰能尋

秋日懷西石王憲副

塞上同遊處經秋不見君
酒杯誰共把書札曠相聞
木落陰山雨沙昏瀚海雲
干戈仍未息一倍惜離羣

春日再登雞鳴山

去歲寒仍夜今來春且晴再登諸道路高眺轉分明
斥堠通沙磧山川擁帝京祇憐征戰後不聽有雞鳴

送郭叅將振赴淮陽總戎二首

分閫向南州王程不可留九邊名已著三楚戰應休
蓬斷狼山野烟昏蜃海樓平生許國志把酒看吳鉤
推轂權方重隴西名素高樽前歌杖杜海上望旌旄
未戰謀先定臨時氣自豪威聲已飛去白日靜波濤

過楊伯起墓

予亦關西裔長年仰素聲之官過古墓採藻薦先生華
嶽開平野桃林有故城如何千載後獨以四知名

環縣早行

邊塞平無日滄江未擬還燈前梳白髮馬上夢青山薄
曙羣峰外殘星杳靄間雞鳴問何處已過古蕭關

題龍門圖送溫侍御還朝

隆慶元年

疊浪下危岑誰言禹鑿深羣龍闢白日客子發孤吟怒
損三川氣愁關天地心憑君為砥柱到海萬波沉

山中見野菊

是處秋能到山寒菊亦開
香偏疑磴壑根故遠池臺不
入神農譜翻令田父猜
陶家三徑裏憶爾賦歸來

永壽道中

不知山縣處忽聽午時雞
城郭到方見烟雲看漸低
人疑勾漏今地即武陵溪
正是花開日香風趁馬蹄

出塞

一望祁連北沙黃晝不分
沿山皆漢幟隔水是塵氛
風

勁霜鵬入磧寒野兕聞髑髏啼白日猶似怨將軍

蕭關北作

塞路山難斷天愁雲不開遙驚戍火起數見羽書來周
室朔方郡唐家靈武臺客心正多感羌笛暮堪哀

宿瓦雲驛

蕭條來野館秋草正淒淒復此聞風雨兼之厭鼓鼙經
年堦樹老入夜怪禽啼獨坐生歸思田園渤海西

憶老母

吾母八旬外其如遊子情正宜憐短日猶自戀浮名馬
為看雲駐詩因陟屺成誰云須祿養江海有袁閔

雪霽遊天界寺

滿寺皆山色房房帶薜蘿松篁寧厭密鐘磬翻嫌多樓
壓雲邊樹池通江上波諸天新霽雪乘月更宜過

齋宿對雪同王雲澤侍郎

在南
戶部

江國欣逢雪飄飄度石城叢篁聲欲碎粉署眼偏明共
慰祈年意仍高作賦情不知刻水曲誰掉夜舟行

謁孝陵

未曉謁松楸儼如拜冕旒
千山環閤室一劍定神州
王氣深鍾阜天威肅暮秋
登高望不極日夜大江流

題武進楊鵞山寫真障子其子為錦衣

早歲遊江縣常時憶太湖
草玄亭在否松月夜仍孤
未遂雲龍志空留水鶴圖
傳家欣有子名列執金吾

宿回龍觀

沙際開瑤館鑾輿幾度過
日迴雙闕迴雲傍九陵多
承

露空仙掌沿堦自綠蘿
夜深清吹發猶憶舊鳴珂

遊大慧寺同李行人熹任計部鎧羅廷評節汪

山人淵賦

寺在京城西

花垂蘿洞口樹滿碧雲層
對境疑為夢前身恐是僧
樓臺依北闕經綸有南能
却恨相過晚登臨意不勝

同舒司寇登城西真如寺塔

寶塔共登臨遐觀遂此心
海山開萬里烟靄淨千林
鳳闕瞻逾近龍宮視轉深
漫言離色界花雨惹衣襟

同朱金庭僚長扈蹕宿甕山寺

野寺臨寒渚僧房依暮山不因扈仙蹕那得叩禪關
朗月旌旗近嚴更鐘梵閒况同朱仲晦高論碧雲間

夏日送王學博之潁

魯南即是楚誰謂客程遙赤日時方急青氈興自饒
花開三戶地門對七星橋歐子讀書所西湖跡未銷

謁長陵

勲業仰重華園陵是帝家山高逼象緯地險鎮龍沙
風

雨諸靈謁松杉萬礪賒為埋弓劍處五色見雲霞

飲谷司馬荷花池

不到濂溪上誰知花正開清臨明月浦美映九蓮臺過

雨看逾好無風香亦來眷茲君子德日暮更啣杯

月浦蓮臺

景
邑中

過井陘淮陰侯祠

將軍破趙處顏廟依荒山伏臘幾人往旌旗到死閒碑

橫秋澗草路入土門關過客空詞賦干戈有愧顏

韓祠斷碑獲鹿志中為八景之一祠在土門左即井陘口也碑多宋元及我朝諸公詩皆辨其事漢之心迹悲其烏盡弓藏似非趙地語况信之伐趙殺戮必多在趙人不宜立祠宜碑之殘斷如此志列之景尤無謂漫跋此於小詩後

過靈石淮陰侯祠

俗云傳首處

一廟荒如此曾登上將壇功高能蓋世名重不辭官
颺夜巖嘯辟羅秋徑寒全身兼報主惆悵古來難

臨城逢賈少尹

正明曾任
海豐簿

下邑均田日高才衆所推豈期淮泗上復見鳳鸞姿
海運終難講河漕要衆思君家三策在定不負明時

屋成

一屋營方罷脩焉到夏初正堪蔽風雨亦足貯琴書
綠樹當門合閒心與世疎久無羊仲過徑草不須鋤

送無名道人還樓子莊

在濱州

滿地寒雲色悲君欲遠遊何方非夢境隨處有丹丘
漢

島孤烟暝秦臺萬木秋他年道成日鶴駕再來不

村中大雪

雪意滿林臯寒深興轉豪尋詩心獨苦訪戴思多勞雀
墮梅枝亞鶴盤松頂高村家門盡掩隔壁問香醪

讀道書

焚香草閣裏隱几讀丹書未解壺中秘聊窺物外虛青
林栖白鳥綠水躍紅魚此際無人語雲消月上初

繁峙縣逢林野橋戶部

秋高山下縣夕照塞邊村以我淹留所聞君慷慨言輒
輸疲內地烽火入關門懷土兼憂國同傷客裏魂

聞東西之警

寧夏與日本

江湖老淚流二月忽高秋每慮東西亂不知早晚休雪
深狐外嶺雲黑蜃邊樓廊廟羣公在應分聖主憂

過兗府遇賢宗中立

王家賢父子海岱有高名今日神仙第古時曲阜城吟
詩唐李賀講德魯諸生醴酒相逢後懷君益劇情

不過賢宗務老詩以言情

未須承面語從古有神交
禮樂河間在詩篇太白豪
南山與壽並北斗自名高
贈我無他物王祥一佩刀

鄒縣謁孟子廟

濟溺微言在論功並禹堪經過
瞻廟貌氣象尚巖巖
泗水宮牆北嶧山城郭南
祇因能直養萬木與天參

苦雨自嘲

南都作

一雨動經旬苔衣逸舍新
豈堪卑濕地况是倦遊人
吏

散官疑客厨空桂視薪司農難自計白下萬家貧

讀高冲寰月下為雪山壽母詩賦此兼有厚望

以有山林語也

雪月兩清奇更吟絕妙詩全無烟火氣雅有玉冰姿堂
上增華髮堦前映壽卮仍當圖大孝千載盛明時

再登黃臺

古臺重眺覽日色帶沙黃雨水三春少風烟萬里長時
時防寇盜處處罷耕桑老淚不須墮經綸有廟堂

時有
備倭

議之

送董喜山任壽州督農判官

喜汝新承命督農濠上原
下帷曾憤志佐郡自多恩
淮水雲生座公山樹到門
循行春正暮花滿楚人村

宿小山望海寺

岩頭燈火起幾處見僧房
蘿薜昏初夜星河滿上方
人歸山店遠磬入海天長
明日正東望蓬萊接混茫

寄四明張公子

翩翩美公子早晚即升堂探韻過南史為園似辟疆越
中江路遠濟上海天長會面無由得裁詩作報章

亂後經小石寺

桑乾河畔寺門對戰場開亂後僧多去雨中客獨來霜
笳連磬院野燒到經臺無計平邊塞塵心空自哀

雪後見樹松二首

俗名樹掛

未到春風裏忽驚樹樹花寒光凝磴壑野氣亂烟霞遠
路歸樵子何枝棲暮鴉佇看消曙色錯認是瑤華

開門看霽雪似霧復如花自訝非玄圃何緣得素霞占
年知大有施食到饑鴉為愛千林色渾忘兩鬢華

訓紀山見寄韻

別離二十載書到見交情始信山居好益憐詩韻清花
開宋玉宅雲抱楚王城何處思君切秋高古北平

戊戌冬日送王醫北遊

京國別多日故鄉重會時青囊術益妙白社許相隨鯨
海波濤在人寰歲月馳那堪又北去風雪正離離

夢遊異境詩以紀之

萬曆己亥秋

天地有靈境却於夢裏遊人家皆古朴風氣絕溫柔不
辨林中草遙瞻雲外樓覺來嘆塵世落木忽驚秋

曹學憲書齋談詩次孟方伯韻

先生非我輩官况似閒居有俸全供客無時不著書檻
雲和竹冷樓月照琴虛大雅詩成後浮榮想未如

贈滿上人

滿老居何寺清幽信水南一心傳四祖大藏閱多函房


許詩人住道於靜者談晚來習禪寂雙樹映苔龕

送劉廣文

君有穀梁學中含涇渭明一官知晚節十脰誨諸生雲
淡滄浪野秋高曲阜城傳經多令子海岱仰芳聲

送譚廣文西歸

官舍連秦島生徒盡魯儒如何捨此去為憶子雲居戶
外清流滿窓中古木疎知君精代理應著景昇書



存家詩稿卷三